

Ebbaluḡa ya Yakobbo Enyanjula

Ebbaluḡa yino, *Yakobbo* nj'owayinandiha. Abahugu mu by'Ebbayibbuli bateberesa baati Yakobbo oyo gaali muganda wa Yesu. Era gaaliho mutangirisi w'ehibbubbu hy'abafugiirira Kurisito mu Yerusaalemu. Yakobbo omwene oyo gaali mulala hu hahiiho mu Yerusaalemu (Bik 15:13). Pawulo galoma ati Yakobbo gaali "hy'esiho" mu bibbubbu by'abafugiirira Kurisito (Bag 2:9). Abahugu baloma baati ebbaluḡa yino bayinandiha mu mwaha ogw'ataanu oluvanyuma lw'ohusaaliwa hwa Kurisito. Hiboneha oti Yakobbo gaḡandiiha ebbaluḡa yino, n'ali mu Yerusaalemu.

Yakobbo gaḡandiihira "abaatu ba Hatonda abasimuha mu biha ehumi nabibiri abasalanihira mu mawanga" (1:1). Wayire ebi Yakobbo gaḡandiihaho binamba hu bafugiirira Kurisito bosibosi, aye ohuloma hu "biha ehumi nabibiri," hiraga hiiti abo aba gaḡandiihira baali Bayudaaya. Ebbaluḡa yino yaali ya bibbubbu by'abafugiirira Kurisito bingi, era yiroma hu biitu bingi. Yakobbo aloma ati ohufugiirira ohutuufu, hubonehera mu bikolwa by'omuutu (2:17). Era alabula abaatu hu binamba hu hwhehubbira ḡagati w'abanjinda n'abagadi (2:1-4). Ng'ahena alabula abaatu ohwegenderesanga ebi baloma (3:1-12).

Ebiri mu bbaluṅa yino mu buupi

1. Yakobbo aheesa abafugiirira Kurisito (1:1)
2. Abafugiirira Kurisito bali n’ohugumira ebigosi (1:2-27)
3. Ohufugiirira huli n’ohubonehera mu bikolwa (2:1-26)
4. Ebibono biri n’amaani (3:1-12)
5. Amagesi ga Hatonda ganjabulo hu g’abaatu (3:13-4:10)
6. Ohwehudumbasa (4:11-5:6)
7. Ohulaabbira (5:7-20)

¹ Kojeeyo, aboluganda. Ndiise Yakobbo omuṅeerese wa Hatonda era owa Musengwa Yesu Kurisito. Mbanandiira enywe abaatu abasimuha mu biha ehumi nabibiri eby’abaatu ba Hatonda abasalanihira mu hyalo hyosihyosi, bafuuha babuli ṅano ni ṅala.

Amagesi n’obunywani mu hufugiirira

² Aboluganda, hiisi olu ebiṅeerinjeri n’ohuhemewa ohwa hiisi ngeri binabagwirenga, muhibalenga ng’ehiitu ehireeta amasaṅalyo, ³ ni mumanyire muuti ohuhemewa hy’ohwo hubatengesya ne hwabongera obugumu. ⁴ Era mweyongere ohuba abagumu ohwolera erala olu mulifuuha abaatu abolereeye abanuma ehinanga ohubahubirano. ⁵ Hanye ṅaliṅo mu nywe anuma amagesi n’ohutegeera engeri ey’ohuba omugumu mu hufugiirira, alombe Hatonda agabira abaatu bosibosi n’atabalilira amuṅe amagesi ago. ⁶ Aye n’aba n’amusunga, alombe n’anumamo ehi gemoota mu mwoyo gugwe. Olwohuba omuutu abaamo

ah'ohwemoota, aba hy'ehiyungi hu maaji ehi embeño ehubba yaanjira eno ni neera. Yeesi awaakawaaka mu mwoyo gugwe ndagumira hu hiitu hiralala. ⁷ Omuutu hy'oyo atanjeeganga ati anjanga ohusuna ehi asungire ohunwa eyiri Musengwa, ⁸ olwohuba omuutu ow'emyoyo ebiri, saagumira hu hiitu hiralala.

Obugadi n'obujinda

⁹ Afugiirira Kurisito oyu bahye babisyamo emoni olwohuba mugadi, gesiimenga mu mwoyo olw'ehyo. Olwohuba wayire abahye bamutala, aye ali n'enjono mu moni ja Hatonda era anahamudunde gamuta anajani. ¹⁰ Olwo n'omuñinda yeesi geesiime olwohuba ti niye Hatonda alimwisa edaala? Omuninda niye ali hy'ehimuli ehinotoha hyakukumuha esaawa yosiyosi. ¹¹ Olwohuba eryuba ni linjanga obubalire bwohya ehirime, ehimuli ehibaho nga hinotoha higwa n'obunoono waahyo nga bugota. Mu ngeri nj'enylene abanjinda boosi baatyopobatiina. Ohufa huboolaho ni batahyetegeheeye, ni befumbire hu gw'ohwendula bujinda owohu hyalo huno.

Ebigezo n'ohuhemewa

¹² Omuutu agumiikiriza ohwola olu alibita mu huhemewa gesiimire, olwohuba n'alihena ohugumikiriza, alisuna ehirabo ehy'obulamu obutanwanjo, obu Hatonda gasubisa abamwenda. ¹³ Omuutu n'agwiranga ebinjeeriñeri, atalomanga ati Hatonda nj'amunindihiiye ebinjeeriñeri olw'ohwenda ohumuhema. Olwohuba Hatonda saanjanga

huhema omuutu yesiyesi era n̄abula aṅanga ohumudulinga oba gamuhema gaahola ehibi. ¹⁴ Ohutusaho ti hiisi muutu hu buwe omwene n’ohwegomba huhwe nj’ohumuhema hwahena hwamusindigirisa, gaahola ebitoola. ¹⁵ Amayiru n’ohwegomba ebi muutu aba ni nabyo bitiina ni bisaala ni byala nga binwamo ehibi era ehibi ehyo ni hiṅangala, nga himuleetera ohufa.

¹⁶ Olw’ehyo balebe bange abahoda, batabadulinganga. ¹⁷ Hiisi hirabo ehiraji, era ehibulaho mbalo, hiṅwa mwigulu. Hiiha ni hiṅwa ewa Hatonda omwene hutonda ebi hubona ni byaduhira mwigulu, oyo atacuuhacuuha hy’ehisisigo. ¹⁸ Omwene gasalaṅo hu lulwe, atusaale mu bulamu obunyaaha n’abita mu buhwenda ow’ehibono hihye ehituufu, ko hibe ti huṅira ehifo ehidaayi mu bitonde bibye.

Ohuṅulira n’ohuhola ebi Hibono hiroma

¹⁹ Olw’ehyo balebe bange abahoda, hiisi muutu abenga mwangu ohuṅulira, aye atabugutananga huloma, era atanguṅirisanga husunguṅala. ²⁰ Olwohuba omuutu anaba n’asunguṅaaye, saṅanga huhola ebi Hatonda genda. ²¹ Olw’ehyo, muleheṅo esambo josijosi ej’ohwehenamo, n’omwoyo ogw’egomba ohuhola ebibi ogubitiriye mu baatu hatyane. Muganye mufugiirire ehibono hya Hatonda ehi baababuulira olwohuba hiri n’amaani ag’ohunonola obulamu wenywe.

²² Ehibono ehyo mutahomanga hu huhuṅuliirisa buṅuliirise mwagama aṅo

olwohuba aṅo muba mwedulinga wedulinge. Aye muholenga ebi hibono hibaloma ohuhola.

²³ Olwohuba omuutu anahoma hu hunjulira bunjulire, aba ali hy'omuutu agebona mu ndabirwamu.

²⁴ Omuutu oyo aheja mu ndabirwamu gebona olu afaana aye aṅo ni naaṅo n'anwanṅo nga gebirira ng'olu afaana.

²⁵ Aye omuutu owetegeeresa amagambi ga Hatonda agatufuula ohuba ab'edembe, ndaahoma hu hunjulira bunjulire gebirira ebi aṅuliiye, aye gegumya ohuhola ebi gamuloma, Hatonda anamuṅenga ekabi mubi ahola.

²⁶ Hiisi muutu oweranga ohuba omunadiini, cooka n'ataṅanga hunjuga lulimi lulwe, oyo aba gedulinga hwedulinga, obunadiini buwe buba ṅabula ehi bumugasa. ²⁷ Obunadiini obutuufu era obunumaho hamogo mu moni ja Hatonda Seefe, nj'ohuba n'omwoyo ogw'ohubbiita abafuubbi n'ohuyeeda abanamwandu mu bugadi waawe, n'ohwehumanga ndigeyonoona n'ebibi ebi abaatu abandi bahola.

2

Ohutaba baluboole

¹ Aboluganda, enywe ng'abafugiirira owenono Musengwa weefe Yesu Kurisito, mutabanga n'oluboole. ² Niipa ng'ehyohuboneraho, singa mubaaye mu luhumbaano lwenywe ṅaabaṅo omuutu owuuja gengira aṅa muhumbaniye ni gambaaye engoye ej'ebbeeyi, n'epeta eya za-abbu, nga n'omugadi awambaaye atyo atyo yeesi gaaja gengira, ³ munasangaalira owambaaye engoye ej'ebbeeyi mwamuṅa aṅa ohwihala

aŋalaŋi, mwamuloma muuti, “Muhulu, ewe yihala ŋano.” Aye mwaloma omugadi muuti, “Ewe hola ni wemereraho aŋo,” oba muuti, “Yiihala ŋaasi aŋo.” ⁴ Munahola muutyo muba simuleetire oluboole ŋagati wenywe era ni muloma muuti abaatu abandi bamugaso ohuhiraho abahyawe?

⁵ Aboluganda ale ni mwetege mbalomere. Abaatu aba mutala olwohuba bagadi, Hatonda niye mbabagatobola ohuba baŋinda mu humufugiirira era gaabaŋa omugabo mu wahabaha buwe ogu gasuubisa abamwenda. ⁶ Aye enywe abanyooma abagadi, leha nindi mbabuse. Abaŋinda sinje ababayikiriza hu byenywe? Abeene abo sinje abanuuna ohubadyedyesa ni babahubba mu mbuga? ⁷ Era abeene abo sinje abaduula oyo oyu mwafugiirira nga Musengwa yenywe olu mwafugiirira?

⁸ Ale hanye mwoheresa egambi eri Kurisito gaatuŋa ng’olu liroma mu byaŋandiihiwa eri galoma ati, “Yendanga omuutu wahyo ng’olu weyenda wamwene,” muba muhola bulani. ⁹ Aye munaba baluboole, muba muhola hibi, era muba mufuuhire babbwagi b’amagambi era ni guhenire ohubahira. ¹⁰ Olwohuba hiisi muutu aŋamba amagambi gosigosi cooka goola aŋaatu gabbwagaho erala, aba n’omusango oguŋeraŋerana n’ogwa ohubbwaga amagambi gosigosi. ¹¹ Hiri hiityo olwohuba owaloma ati, “Soholanga buhwedi,” omwene oyo nj’owahena gaaloma ati, “Siwitanga muutu wahyo.” Kale oŋangire ohuba ti soholo buhwedi aye wi-

ita abaatu bahyo, aṅo oba oli mubbwagi w'amagambi. ¹² Olw'ehyo mulomenga era muholenga ebi muhola ni mumanyire muuti Hatonda alibasalira omusango ni geema hu magambi gage agatufuula ab'edembe. ¹³ Olwohuba hisisi muutu abula husaasira eri owahye ni Hatonda yeesi alimusalira omusango n'abula husaasira, aye aliba n'ohusaasira eyiri oyo asaasira abahye.

Ohufugiirira ko n'ebikolwa ebiraga ohufugiirira ohwo

¹⁴ Aboluganda, singa omuutu aloma ati afugiirira Kurisito, aye n'atahola bikolwa ebiraga ohufugiirira huhwe, ehyo hiri n'ehi hiṅanga ohumuyeeda? Dala ohufugiirira hy'ohwo huṅanga ohumunonola? ¹⁵ Ha hulome singa ṅabaṅo oboluganda omusinde oba omuhasi aṅuma ehi gedanya hu mubiri n'ehi anabisye enamunwa, ¹⁶ mulala hu nywe gamuloma ati, "Owoluganda, tiina werabirire; onahasune ehyohulya n'ehyohuwiiha amagumba" cooka ndabaho n'ehi amuṅaaye, ehyo hiba n'ehi hiyeeda omuutu oyo ali obubi? ¹⁷ Kale n'ohufugiirira hwoosi huutyo. Singa huba hwoṅene ni huṅumaho bikolwa ebihuṅereheraho, huba huṅuma mahulu.

¹⁸ Aye hamunga ola aṅanga ohuloma ati, "Ewe yebeere aṅo n'ohufugiirira huhwo, ese naabe n'ebikolwa." Ese keesi ndoma ti ale ndage omuutu aṅanga ohufugiirira Kurisito aye n'aṅuma bikolwa. ¹⁹ Hituufu hyene ti ofugiirira

oti Hatonda ali mulala. Ehyo hiraŋi. Aye hebulira oti n'emisambwa joosi jiityo pojifugiirira era ehyo hijireetera ohukaakana olw'obuti.

²⁰ Musirusiru ewe, wahendire kuŋe ehiraga ti ohufugiirira ohuhayaga ohuŋumaho bikolwa ebiraga, huŋuma mahulu?*

²¹ Hiina ehi Hatonda gemaho ko asiime sehulu yeefe Yibbulayimu? Sigeema hu hokolwa hihye ehy'ohuŋwa hu mwana wuwe Yisaka abe eŋongo eri Hatonda?*

²² Oweene otye? Ohufugiirira huhwe n'ebikolwa bibye byatiinira ŋalala, era ebikolwa bibye nj'ebyejulirisa ohufugiirira huhwe. ²³ Ng'ehyandiihiwa hyolerera ehiroma hiiti, "Hatonda gabala Yibbulayimu ohuba mugwalaafu olw'ohufugiirira ebi gamuloma era olw'ohufugiirira huhwe, gafuuha meeriwe."*

²⁴ Peega ti muweene muuti ebikolwa ebi muutu ahola nj'ebimuleetera ohumubala ohuba omugwalaafu sosi hufugiirira hyoŋene. ²⁵ Mu ngeri nj'enyene pohyali ni Rahabbu omuhasi owaali omuhwedi. Hatonda gamubala ohuba omugwalaafu olw'ehokolwa hihye ehy'ohusangaalira n'ohuhweha mu nyumba yiye abaatu abaali ni batiinire ohuheetera Abayisirayiri. Abaatu bano gahena gabayeeda ohweyiba n'ohuduluma ni babitira mu girira eyindi.

²⁶ Mu butuufu ng'olu muhimanyire muuti omubiri gunanumamo mwoyo guba mufu, n'ohufugiirira hwosi huutyo. Ni hutabaho ebikolwa, huba hufu.

* **2:20** 2:20 Oba huba hufu. * **2:21** 2:21 Tand 22:9-10 * **2:23** 2:23 Tand 15:6

3

Ohwehuuma mu malomere

¹ Aboluganda, mutagesyaho mwesimwesi ohufuuha abasomesa b'ehibono hya Hatonda, olwohuba ng'olu mumanyire, efe abasomesa abahyefe, Hatonda n'aliba n'atulamula, saalituleheramo kadi najatotono. ² Abaatu hwesihwesi anabula hwabulira, hubbenga mu hino oba hira. Cooka nanabano omuutu atabbenga mu malomere, oyo aba anangaaye mu hufugiirira huhwe, era n'ananga ohufuga omubiri gugwe gwoSIGWOSI. ³ Singa omuutu abaaye gendire esolo eyi balanga baati embalaasi emugondere n'ecuhira hiisi eyi aba ni gendire, ayita ehroma mu munwa ohumuyeeda ohuhola ehyo.

⁴ Leha nindi hunege hu meeri ng'ehyohuboneraho ehindi. Wayire emeeri guutu gubbala era embeno ey'amaani nj'enanga ohugugeesya, omuutu ayigimba atambisa ahaatu hatotono heene enyuma waayo ohuyicuusa ohutiina hiisi eyi aba ni genda yitiine. ⁵ Mu ngeri nj'enyene, n'olulimi lw'omuutu lwosi luutyo. Wayire olulimi hamesu hadyagala hu mubiri gw'omuutu, omuutu alutambisa ohwepaaha mu biitu ebyene ebingi. Neega hu deno hasiigu eryahula lyasidiha ng'olu ahaliro ahatotono halinamba lyanya lyaguhuliha.

⁶ Kale n'olulimi lwosi luli hy'omuliro. Lwijuuye obubi obwehyalo hyosihyosi era nj'ehimesu obumesu eh'y'omubiri gw'omuutu, aye lusaala ehibi ehimaamira obulamu bw'omuutu wosiwosi. Ebibono ebi lulimi luloma

bisaala obuyoga mu baatu obuli hy'omuliro ogwehereba ni gutasima ogusihirisa hiisi hiitu aña gubita. ⁷ Olwohuba ohwemera erala hu hutonda hw'ehyalo, omuutu ali n'obunangi ohunuga ebiha byosibyosi eby'esolo n'enyuni, n'ebyenjalula, n'ebiramu ebyomu maaji. ⁸ Aye ñañuma muutu hu buwe añanga ohunuga olulimi. Olulimi nj'ehiitu ehigosi, ehitafuliha ehiñanga ohuleeta amafa mu abaatu hy'obusagwa bw'etemu. ⁹ Olulimi olwene olu muutu atambisa ohujumirya Musengwa era Seefe, nindi olwene olwo nj'olu atambisa mu hunwaba abaatu aba Hatonda gawumba mu hifaananyi hihye. ¹⁰ Mu munwa nj'omwene, pomunwa ebibono ebijumirya n'ebinwaba. Aboluganda, ehyo sihisaana huba hiityo. ¹¹ Esulo y'amaaji endala sesobola hunwamo amaaji amalaji n'amaaji agalimo ehiñomeresi ehya cumbi. ¹² Aboluganda, dala omusaala omutiini gunanga ohwamaho ebibala eby'omusaala omuzayiti, oba omuzabbibbu gwamaho ebibala eby'omusaala omutiini? Mu ngeri nj'enyene, esulo ereeta amaaji ag'ehiñomeresi hya cumbi seenanga hunwamo maaji agabulamo hiñomeresi ehyo.

Amagesi aganjwa eyiri Hatonda

¹³ Ñalijo mu nywe omuutu ali n'amagesi ag'ohwabula ehirañi n'ehibi? Omuutu oyo alage amagesi ago mu sambo endaji eyi gebisyamo, nomu bikolwa ebi ahola mu hwenomeha ohunwa mu magesi ago, aga ali ni nago. ¹⁴ Aye munaba n'emyoyo ej'ekirihindi n'ohutenda

yabahyenywe ohusaala esodi, mutepaaha muuti muli bagesi olwohuba munahihola, muba mwedulinga. ¹⁵ Amagesi ag'engeri eyo siganjwa yiri Hatonda, wabula gaba g'abaatu abanjeega hu by'ehyalo. Omwoyo wa Hatonda sinje agaba amagesi hy'ago wabula ganjwa yiri Sitaani. ¹⁶ Olwohuba hiisi anjaba omwoyo ogw'ekirihindi n'ohutenda yawahyo husaala esodi, njabanjo nionionio n'ebibi ebya hiisi ngeri. ¹⁷ Aye abaatu ababa n'amagesi aganjwa eyiri Hatonda, ehidaayi nadaayi baba n'emyoyo migwalaafu. Ehindi baba baatu abenda emiyaaya ohubano, abehaliiriha era abali n'ohwenda eri abahyawe. Olw'ohwenda ohu baba ni nahwo eri abahyawe, babaholera eby'ehisa ni batehubbira era ni bali b'amazima mu bibahola. ¹⁸ Bahola ehyo olwohuba baholerera emiyaaya jibenjo era n'ebibono ebi balomera abaatu binjwamo ebikolwa ebi Hatonda genda.

4

Ohuhola omuhumba n'ehyalo

¹ Hiina ehireeta obuyoga n'ohunjirirana njagati wenywe? Ehyo sihinjwa hu mwoyo ogw'omuhopo ogu muli ni nagwo? ² Mululuhanira bugali ebiitu ebi mujuma aye ndimubyolaho. Ehinjwamo nga mwita abahyenywe. Oguhopo gubanjira n'ohubi mutanjanga husuna, ehinjwamo buyoga n'ohunjirirana. Era simusuna ebi mwenda olwohuba simusaba Hatonda hubibanja. ³ Ate n'olu musaba Hatonda abanje ehi mwenda,

saahibaŋa olwohuba musaba ni mugenderera hweruuha ni mubihenera mu hwesangaasa mwabeene.

⁴ Enywe abali hy'abafumbo abahwedi, simumanyire muuti onahola omuhago n'ehyalo obawesaalira bulabe eyiri Hatonda? Hiisi muutu asalaŋo ohuhola omuhumba n'ehyalo, afuuha mulabe wa Hatonda. ⁵ Oba muŋeega muuti ehyaŋandiihiwa ehiroma hiiti, "Hatonda abubira Omwoyo oyu gatuŋa ohuba mu bulamu weefe" hibula mahulu? ⁶ Aye Hatonda geyongerera hutuŋambira hisasabirisi. Nj'ehigira ehyaŋandiihiwa ehindi ni hiroma hiiti, "Hatonda sigenda abehudumbasa, aye aŋambira abo abeŋomeha ehisasabirisi."* ⁷ Olw'ehyo mweŋeeyo eyiri Hatonda. Muŋiriŋanienga Sitaani, yeesi gaaja hubatya abadulumenga. ⁸ Mute owesige mu Hatonda, yeesi aja hubeŋa abenga ni nenywe. Mulongoose obulamu wenywe, enywe abali n'ebibi, enywe abali n'ekubbiro n'engaluliro. ⁹ Muwombonjale, muhubbe enduulu, mulire n'amasiga. Mugawiiheho, enjeho jenywe jifuuhe amaliro, n'esangaalo lyenywe lifuuhe mombo olw'ebibi ebyo ebi muhola. ¹⁰ Mweŋomehenga mu moni ja Musengwa, era Ye omwene aja hubadunda abate aŋalaŋi.

Mutasaliranga bahyenywe musango

¹¹ Aboluganda, mutageyananga. Hiisi muutu ageya owahye n'aloma ati ehi aholo hibi, aba atala amagambi ga Hatonda n'aloma ati mabi.

* 4:6 4:6 Nge 3:34

Onatala amagambi ga Hatonda waloma oti mabi oba soonjanga huhola ebi galagira wabula oba wepatiihaho ogw'obulamuzi. ¹² Omwene hutano magambi era nga nj'omusali w'emisango ali mulala, nje Hatonda. Oyo nj'anjanga ohunonola era nj'anjanga n'ohusihiirisa. Ne ewe weranga ndiwe ani ko osalire owahyo omusango?

Ohulabula eyiri abaatu abepaaha

¹³ Ale njaaani ni mwetege mbalomere enywe abebuja muuti, "Olwa leero oba olwejo hunahatiine mu hibuga hirebe, huheneyo omwaha mulala ni huhola eby'amatano husune amagoba." ¹⁴ E! Enywe omutamanyire ng'olu bunahahye olwejo mujanga ohuloma muutyo? Mumanyire ehi obulamu wenywe buli? Simumanyire muuti enywe muli hy'ehisuusu ehibaho ahamanga hatotono nga hinjwano? ¹⁵ Mwahali muloma muuti, "Musengwa n'anahaganye wahya buhaana, hunahahole hino oba hira." ¹⁶ Aye njaaani mundoma hy'eyenywe eyo muba mwepaaha, ni muhinjira muuti ebiitu biri mu bujangi wenywe. Ohwepaaha hwosihwosi ohwengeri hy'eyo huba hubi. ¹⁷ Olw'ehyo, hiisi muutu amanyire ehirani ehi gahali n'ahola aye ndaahihole, aba aholire hibi.

5

Ohulabula eyiri abanjinda

¹ Ale njaaani abanjinda ni betege, mbalomere. Bahole batagihireno ohubbologa ni berira olw'ehiseera ehigosi ehinahabooleho.

2 Obuḅinda waawe obu babungire bubabulira mahulu, buli hy'ehiitu ehibolire ehiḅunya ehibulu. Ebyambalo byawe eby'ebbeeyi biri hy'ebi hayenje mulusi aliiye. ³ Hu ludaalo olu Hatonda anahasalireho omusango, eby'obuḅinda ebyo binahabule mahulu hy'ehyoma ehitagire ng'olu hitaba n'omugaso eri omweneehyo. Eby'obuḅinda ebyo ebi bahuhuta ni nabyo mbebinahabe obujulizi obulaga ng'olu baluluhanira obuḅinda era ng'olu bali bagumu era abatenda huyeeda abahyawe abali mu bugadi. Bahumbanise era behuhuta n'ebyoḅinda, ne bamanye baati ekomerero y'ehyalo yiri huupi hwola babasalire omusango. ⁴ Ale nindi ni betege mbalomere! Abatambi abahola mu ndimiro jaawe beririgana olw'ohubakupania omuhemba gwawe era ohweririgana hwabwe hwolire mu matwi ga Musengwa Omwene Buḅangi. ⁵ Banyooye obulamu w'ehyalo, era besangaasa ng'olu babona baati pohyola ohuba. Basangahiise emyoyo jaawe aye bebiriye baati Hatonda anaatere ohusihiirisa abahosi b'ebibi. ⁶ Baleeteeye abaatu ababulaho musango ohubasalira omusango ohubahira era babetisa obwerere oweene olwohuba sibāḅanga hwesoolaho.

Ohugumikiriza n'ohusaba

⁷ Ne enywe aboluganda, mube bagumikiriza ohwola olu Musengwa anahagobole ohuḅwa mwigulu. Mubonere hu mulimi ng'olu ahuumiirira ohwola olu fula endaayi ko

n'erondaho yigwa eroba lyamesa, lyahusa era lyamyamba ebirime ebi aba n'ahomire mu ndimiro yiye. ⁸ Mwesi muutyoo mube bagumikiriza era abagumu, olwohuba Musengwa ali huupi hugobola. ⁹ Aboluganda, mutenulunjunyanga hu bahyenywe, olwohuba banahabasalire omusango ohubahira. Ale mubone Yesu omusali w'emisango omuhulu anaatere ohwola.

¹⁰ Aboluganda, mubonere hu banaabbi abalomanga mu siina lya Musengwa, ababonaabona aye bagumikiriza. ¹¹ Ng'olu mumanyire, beesimire abo abagumikiriza ohwola hu komerero y'obulamu waawe. Mwanjulira ebyafuuye hu Yobbu omuhalehale ng'olu gagumikiriza, era mumanyire ehi Musengwa gamuholera oluvanyuma. Mu butuufu Musengwa ali n'ehisasabirisi. ¹² Aye balebe bange, ehihulu mu byosi, mutamalanga galayira muuti "Mu mazima aga Hatonda ali mwigulu," oba ehvalo oba mu siina ly'ehiitu hyosihyosi aye mulomenga amazima. Ni mulomanga muuti, "Pohiri," dala hibenga ni hiri c'ehyo era ehi munagaanenga muuti "Bbe" hyosi hibenga nga c'ehyo. Anabula ehyo banahabasalire omusango ohubahira.

¹³ Hanye njalino mu nywe ali n'ebigosi, asunge Hatonda amuyeede. Hanye njalino asangaaye, gembe enyembo n'amujumirya. ¹⁴ Hanye njalino omulwaye mu nywe, alange abatangirisi b'ehibbubbu hy'abafugiirira Kurisito, bamusabire bamunaha n'amafuta, mu siina lya Musengwa. ¹⁵ Ohusaba ohu bamulombera n'ohufugiirira, hugema

Musengwa gesuusa omulwaye oyo; era n'aba n'ali n'ebibi ebi gaahola, Hatonda abimusonija. ¹⁶ Olw'ehyo, hiisi muutu abbutulirenga owahye ebibi bibye era hiisi muutu asabirenga owahye ko mujone mube n'obulamu. Singa omuutu omulujamu asaba, esaala yiye yiba n'amaani agaletera ebiitu ebi asungire ohubaŋo. ¹⁷ Ale mubonere hu naabbi Eriya owaali omuutu hyefe. Ni gasaba n'omwoyo mulala, efula siyatonya ohuhena emyaha edatu n'emyesi mukaaga. ¹⁸ Nindi ni gasaba efula yigwe, Hatonda gatonyesa efula ng'eroba limesa ebyohulya.

¹⁹ Aboluganda, singa mulala hu nywe aŋaba, gaŋwa hu ngira ya Hatonda etuufu, ne ŋabaŋo mulala hunywe amugobosa, ²⁰ muhimanye muuti omuutu yesiyesi aba n'ayeedire omuhosi w'ebibi oyo, ohuŋwa mu hubbenga huhwe, aba aŋonisye omwoyo gw'omuutu oyo ohufa era aletera Hatonda ohusonija ebibi ehipyeda ebi omuutu oyo aba ni gahola.

Endagaano Epyaha mu Lunyole
Nyole: Endagaano Epyaha mu Lunyole (Bible)

copyright © 2019 Wycliffe Bible Translators, Inc.

Language: (Nyole)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

e00787cd-838f-597a-9477-00b97e4e2cff